

E AMBIENTE DI CAMPAMENTO NA ARUBA



ORANJESTAD (AAN): Compara cu otro añanan, durante e Semana Santo ultimo aki, ta duna impresion cu menos hende a bay campa e aña aki, mas si tene na cuenta cu ta basta turista a bishita Aruba y cu nan tambe ta forma parti di e hendenan cu por a mira riba beach.

DIARIO a saca algun potret, cu intencion di haci un comentario general di loke por a mira riba beach den e fin di siman largo cu a pasa.

No por kita afo, cu redaccion mester bini cu algun remarque no mucho positivo, pero cu e unico intencion di concientiza un ke otro persona, sea cu a bay campa of cu simplemente a bay disfruta di lama un rato, pero cu no a tene na cuenta cu otronan cu tambe kier a pasa nan dianan di campamento cu tur tranquilidad.

Entre otro por a mira un yate cu turista, y principalmente varios "banana boat" y

speedboat nabega cu velocidad halto, y demasiado cerca di e canto di lama, loke a causa hopi protesta, segun DIARIO mes por a ripara, di hendenan cu tabata landa, y cu a sinti nan mes den peligro, y mas ainda cual yiunan (muchacha) tabata hunga den lama. Segun DIARIO por a mira entre Diahuebs atardi caba te cu Diasabra, e situacion no a cambia, te cu Diadomingo si a nota un cambio y por a mira con e hendenan ya a navega na cierto distancia leu for di e beach, loke ta duna impresion cu autoridadnan concierne mester a interveni.

SUSHI RIBA BEACH

E Fundacion Aruba Limpi a pone riba beach, na disposicion di e campistanan, algun container, cu hasta nan a laga verf color roos bunita. Lamentablemente por a mira cantidad di cup, boter, bleki, etc., benta abao. Saconan pa tira sushi aden tambe a worde parti pa duna e campistanan tur facilidad pa nan no benta sushi abao, pero toch, tin hende cu no a atende cu esaki.

Por a ripara restonan di carbon y shinishi di B.B.Q riba beach, benta den santo, loke sigur ta un hecho criticable, pasobra a pesar di tur esfuerzo y motivacion pa mantene e playanan limpi, tin hendenan cu no kier a tende.

TURISMO

Turistanan a bin goza di nos beachnan den Semana Santa. A capta atencion di camera, ta un pareha aparentemente Mericano, sinta riba beach cu un bunita cachó preto cu tabata parece mas bien un peluche gigante, cual nan tabata peina su cabey di un manera masha delicada mes, manera potret ta mustra. Cu tin hende ta stima cachó, ta un hecho!

Tambe por a mira un muher turista canando "top less", a lo

largo di Eagle Beach kende a yama atencion tanto di grandi como di muchanan. DIARIO tin entendi cu esey no mag tuma lugar den bista publico mas, aunque no ta confirma pa si tin of no un ley vigente al respecto.

UN BISTA GENERAL

En general por a nota un ambiente trankil, gruponan di hoben sinta na canto di caminda te anochi laat, y hasta por puntra si nan tabata tin tempo pa drumi. Dilanti Eagle, por a mira un fila grandi di auto core rond pocopoco, durante e anochinan aki consecutivo, mientras cu riba beach hopi hende tabata tende musica, conversa, hunga y hasta baila, manera den tempo di carnaval.

Famianan completo hasta cu babynan, a bay laga riba beach y den lama parti di nan stress, kizas acumula pa motibo di trabao y un ke otro problema. Aunque bay campa no ta riba su mes, e sentido cu Semana Santa tin, alomenos e dianan aki por a mira famianan completo comparti tempo cu otro, loke tin biaha, den e dianan ge-woon di actividad laboral y school ta falta den hopi hogar.